

9. oktober 2025

UKA 2025/106

Avanersuarmi inuussutissarsiutinik inerisaanissamut siunertalimmik periusissiorinissamut, ilaatigut qaammarsaassutinik pikkorissaanernillu imaqartussamik UKA2026-mut suliaqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Siullermik siunnersuuteqartoq Lars Poulsen, Siumut qutsavigiumavarput siunnersuummut pingaaruteqartumut qaqitaanut, tamannalu Siumumiit imaattumik oqaaseqarfigissavarput.

Nunatsinni sumiikkaluaruttaluunniit piffiit inerisarneqarnissaat eqqarsaatigalugit inuussutissarsiornikkut periarfissanik siuarsaasoqarnissaa qitiuvoq, taamaammallu siunnersuuteqartup immikkut Avanersuup ukkanneqarluni Naalakkersuisut periusissioqqullugit siunnersuutaa pitsaasutut isumaqarfigivarput, tassani avannaarsuani inissisimanera, avinngarusimasumiinnera kiisalu ullumikkornit malunnaatilimmik inuussutissarsiornikkut ineriartortoqartariaqarnera eqqarsaatigalugit.

Ullumikkoqqissaaq pissutsit piviusut qissimigaaraanni Avanersuarmi inuussutissarsiutitigut inerisaanissamut periarfissat annikitsuinnaapput, piniarneq ukiuuneranilu sikuunerani aalisarneq annerpaamik kisimik isumalluutaatillugit. Silaannaap allanngoriartornerata kingunerisaanik ukiup ilangaatsiaani inuussutissarsiutitigut inuuniarnikkullu eqqornerlunneqartarneq Siumimittaaq aamma ilisimaaraarput.

Taamaammat Siumumiit isumaqarpugut Avanersuarmi inuussutissarsiutitigut inerisaanissamut Naalakkersuisut periusissiorinissaat pingaaruteqartoq, ilaatigut Avanersuarmi innuttaasunut tamanut sammisumik pikkorissaanernik ilinniartitsinernillu pilersaarusiornikkut.

Massakkumut inuussutissarsiutigineqartut eqqarsaatigalugit inuussutissarsiutinik inerisaanissamut periarfissat killeqaqaat, ilaatigut Avanersuarmiit tunisassianik assartuisinnaanermut periarfissat annikitsuinnaanerat oqaatigisariaqarluni. Ukiumut qaammatit qulit missaanni assartuineranut silaannakkut assartuineq kisimi isumalluutaavoq, taamaammat sullissinerup iluani Avanersuarmiit inuussutissarsiutitigut piorsaanermi nassiussinissamut periarfissat akitigut immikkuullarissumik naleqqussaaviginissaat pisariaqartoq Siumumi isumaqarpugut.

Pituffiup inissisimanera aamma Pituffimmiit Amerikamut Europamullu silaannakkut aqqudit atorluarlugit inuussutissarsiutitigut inerisaanermi periarfissat atorluarneqanngitsut atorluarneqartariaqartut Siumumi isumaqarpugut. Periusissiamik suliaqarnermi Pituffiup nunap



immikkoortuani pineqartumi inuussutissarsiutit ineriartortinneqarnissaannut suliniarnermi peqataanerunissaa aammalu sunniuteqarnerunissaa Siumumiit piumasarissallugu naleqquttuusoraarput taamaattussatullu isigalugu.

Inuussutissarsiutinik nutaanik piorsaanissamut Avanersuarmiut aningaasaateqarfiat Thulefondi suleqatigalugu ilinniartitsinerit pikkorissaanerillu ingerlanneqartariaqarput, ilaatigullu pikkorissaanerit soorlu makkuusinnaallutik. Akuerisaasumik inuussutissalerinermik pikkorissaanerit, suliffinnik nutaanik pilersitsinissamut pikkorissaanerit, siumut sillimaffigineqartariaqartunik piumasaqaatinillu pikkorissaanerit. Taamatuttaaq ilinniartitsinerit Avanersuarmut naleqqussakkat pilersinnissaannut tunuarsimaartariaqanngitsugut Siumumi isumaqarpugut, soorlu inunnik sullissinermi aammalu niuernerup iluani.

Pisortat suliffeqarfiisa innuttaasunik kiffartuussinerat qanoq ingerlaaseqarnerisq paasisaqarfigissallugu aamma soqutiginaateqartutut isumaqarfigaarput, inuussutissarsiornikkummi ineriartortitsinissamut siunnersortaasinnaasut pisortaqarfinni aamma isumalerujussuussammata.

Avanersuarmi piffiit avinngarusimasumiittut allat assigalugit aamma assassortunik soorlu mekanikerinik assigisaannillu amigaateqarneq annertuumik atugaasartoq paasivarput, ilaannilu qaammaterpaalunni tikinneqarnissamut utaqqisariaqartarnerat inuussutissarsiutinik ingerlatsinermi annertuumik sunniuteqartarpoq, taamaammat pisortaniit Qaanaami pisortat suliffeqarfiisa immikkut innuttaasunik suliffeqarfinnillu sullissisinnaasariaqarnerat Oqartussanit ammaanngartariaqartoq Siumumi isumaqarluta.

Naalakkersuisut siunnersuutip itigartitsissutigineqarnissaa oqariartuutigigaluaaraat Siumumi isumaqarpugut siunnersuut taparserneqartariaqartoq, pingaartumik sammisaq attuumassuteqarluinnartoq ippassaq oqaluuserinerani partiit tamattaalluta, Naalakkersuisullumi, nunap immikkoortuini ineriartortitsinissat ataatsimoorfigeqqissaakkagut eqqarsaatigalugit. Sammisaq siunnersuummut massumannga attuumassuteqaaqqissaartoq ippassaq ataatsimoorfigeriarlugu siunnersuut manna itigartitsissutigineqassappat eqqumiilliornassaaq - pakatsinaqaarlu.

Lars Poulsenip Siumumeersup siunnersuutaani pineqarpoq qanoq ineriartornissanik nutaanik pilersitsisoqassanersoq. Siunnersuuteqartoq kissaateqarpoq Avanersuarmi ineriartornermik aallartitsisoqassasoq, tamannalu pilersitsiortornikkut inuisalu ikorfartorneqarlutik sulinermikkut pilersissagaat. Killormut Naalakkersuisut isiginiagaat tassaapput socialitigut qanoq aporfeqartoqarnerisq aamma inuiaqatigiinni.

Taamaammat siunnersuuteqartup anguniagaa, tassalu sumiiffimmi iliuuseqarsinnaassutsip ikorfartorneqarnissaa, Naalakkersuisuniit akineqarpoq systemip qanoq ittuuneranik, isumaginninnikkut ajornartorsiuteqartoqarneranik aammalu qitiusoqarfimmiit isiginnittariaatsip qanoq ittuuneranik. Ila nunap immikkoortuini tamani ajornartorsiutit tamakku minnerusumik annerusumilluunniit piupput. Isorliusoqarfiinnuku uani pineqartut.

Siumup kissaatigaa inuit aningaasarsiornerulernissaat aqutissiuunneqassasoq – inuit annertunerusumik ineriartoqqinnissaminnut periarfissinneqassasut – Naalakkersuisulli



akissutigaat, ineriartoqqinnissaminnut periarfissinneqassanngitsut inuttut ima imatullu atugaqarmata.

Tamanna Siumumiit ilungersunartutut isigaarput.

Siumumiit taamatut oqaaseqaateqarluta siunnersuut tamakkiisumik ilalerparput Inuussutissarsiornermut Aatsitassanullu Ataatsimiititaliami aappassaaneernissaa sioqqullugu suliareqqaarneqarnissaa innersuussutigalugu.

Anders Olsen
Siumut